



«Shake hands» denter Schluein Glion ed il HSV Hamburg. Pils giugadurs indigens in bi mument.

FOTOS G. VENZIN



Il capricorn da Grischun Vacanzas survigilescha il trenament dil HSV Hamburg.



Gaudenz Thoma, il meinafatschenta da Grischun Vacanzas, ha carmalau il HSV Hamburg en Surselva. Gian Arpagaus ha presidiu l'Uniuon sportiva Schluein Glion e tgamanu il project dalla Arena Raiffeisen Crap Gries.



Igl anteriur giugadur professional Bruno Labbadia ha tenui il HSV Hamburg ella «Bundesliga».



Las scenas interessantas hai dau avon il gol dils indigens. Il defensur indigen liberescha cul tgau.



Carlo Bearth meina il bal sco in profi denter ils giugadurs dil HSV Hamburg.

In gol d'honor per Schluein Glion

Il HSV Hamburg ha gudignau 13:1 encunter Schluein Glion

DA GIUSEP VENZIN / ANR

■ Schluein Glion ha vuliu impedir in gol ellas empremas minutas, mo adumbatten. Gia ella tiarza minuta ha Philipp Müller sittau igl 1:0 ed ils gols ein curdai in suenter l'auter. Ella squadra da Hamburg han plirs giugadurs novs e giuvens giugau e quels han vuliu mussar al trenader Bruno Labbadia lur potenzial. Els ston far quei per haver la schanza da vegnir numnai pigl emperem giug dil proxim campinadi miez uost encunter Bayern München. Quels giugadurs han giu negina misericordia el giug amicabel avon varga 1500 persunas ed han giugau gat e miur culs giugadurs d'Urs Casutt. Ell'emprema mesadad han ils giugadurs da Schluein Glion strusch dumignau ord lur mesadad. La megliera equipa grischuna encunter ina

equipa dalla «Bundesliga» – quei ei stau naven dall'entschatta in giug denter David e Goliat. Ils giugadurs da Schluein Glion han mussau quei ch'els san ei quei ei enconuschentamein buca pauc. Quei ha denton buca tunschiu da resister al HSV Hamburg, mo quei savevan ins gia avon ch'il giug entscheivi. Cura che Hamburg ha giu sittau avunda gols ha el era schau vegnir Schluein Glion pli datier dil gol. Ella 69avla minuta ha il capitani Ramon Derungs sittau il gol d'honor.

Ils Svizzers han muncau

Ella squadra han ils dus profis svizzers Johann Djourou e Valon Behrami muncau el giug amicabel. Senza dubi havess la preschientscha da quels dus giugadurs nazionals aunc augmentau l'attractivitat. Els han aunc fatg ina pausa suenter

ils giugs culla squadra nazionala ed ein uss el camp da trenament a Crap Gries.

A Laax ei era il directur dil HSV Peter Knäbel arrivaus la dumengia ed ha stuiu dar plaid e fatg dallas acquisiziuns novas dil club ch'ei mitschias cun cleg dalla relegaziun. Da quellas acquisiziuns scrivan allura tuttas gasettas tudestgas e fan aschia empau reclama per Laax e Schluein. Dalla hospitaliad en Surselva ei il trenader Bruno Labbadia en scadin cass incantaus. Aschia ei el s'exprimius differentamein.

Valon Behrami tuorna anavos ella equipa dil HSV suenter haver fatg vacanzas ad Ibiza. El sto batter per in plaz. Gia la primavera haveva il giugadur origin dil Cosovo constatau che Hamburg seigi per el ina schliata experienscha. Il giugadur da 30 onns era vegnius la stad 2014 da Napoli tier l'equipa tudestga.



Il capitani Ramon Derungs (cul bal) ha sittau il gol d'honor. Bruno Labbadia (seniester sil baun) ed Urs Casutt (seniester da Ramon Derungs) ein ils trenaders dallas duas equipas.



La tribuna dil stadiun niev ei stada fullanada. Varga 1500 fans han persequitau il giug amicabel.